

Nasegrübler-Gugge



Als Heidi hett si, s'isch bekannt
zeigt wie's stoht im Pornoland.
Mir hei bi eus mit gueter Luune
über d'Schwizer chönne stuune,
wie die - s'isch ganz verruggt -
sich hei a d'Fraue anedruggt.
D'Lätitia het mit ihrer Fahrt
ä Mords-Erfolg gha ab em Start.

Mit ihre chönsch ä huffe mache,
verdiensch vil Gäld mit Porno-Sache.
Leider het me's erscht z'spoot gmerkt,
dass durch sie würd d'Wirtschaft gstärkt.

Im Ethno-Look mit Heidi-Chleidli
gseht si us wie s'brevschti Meitli,
grad eso wie d' Schwizer Delegation
bim Iizug is Olympia-Stadion.
Jetzt stell dr vor, hüt muess mes chlage,
wenn si hätt dörfe d'Fahne trage.
D' Iischaltquote hätti gwunne,
alli wäre vor ä Färnseh gsprunge.

Und stell dr vor, findsch keini Wort
statt s'Vreni Schneider hät dr Civi-Sport
d'Lätitia gholt für s'Autogramm:
d'Laufner steche hüt no stramm!

Und bi eusem Ernscht-Bettware
miesst me o-n-eso verfare:
Mit em Günthör Werni isch kei Staat me z'mache
für ne Wasserbett, das isch zum Lache.
D'Lätitia sett dört aneligge,
im Heidi-Look, däm schöne schigge,
denn chönnt me, statt en einsam z'hiete,
dr Lade stundewies vermiete!

O hinger d'Theke vo dr Törli-Beiz
sett d'Lätitia stoh mit ihrne Reiz.
Wenn me s'Fleurys dech durch sie ersetze,
würde alli Lüt dört ane hetze.

Dr Steiner hett an Wiehnacht s'Huus verziert
mit Aengel, Liechter, alles garniert.
Besser wär's - är hett's vergässe -
d'Lätitia wär imene Fänschter gsässe.
D'Laufner Männer wäre gschprunge,
und är hätt d'Wahle klarer gwunne.

Zum Schluss wei mir em Schmidli säge
si Stiftig würd's no besser fäge,
wenn er derfür chönnt Sorge,
dass d'Lätitia d'Fahne hisst am Morge
und är als Geissepeter ohni Spott,
dech salutiere stramm und flott.
Und würd's dr Mamie live im Färnseh sände,
deche o mir für so nä Stiftig spände...